

李翰林集卷第二十六

翰林供奉李白

記銘頌文

任城縣廳壁記

化城寺大鐘銘 并序

天門山銘

趙公西候亭頌

崇明寺佛頂尊勝陀羅尼幢頌

為竇氏小師祭璿和尚文

為宋中丞祭九江文



任城縣廳壁記

風姓之後國爲任城蓋古之秦縣也

一云秦之在禹古縣也

貢則南徐之分當周成廼東魯之邦自伯禽至于順公三十二代遭楚蕩滅因屬楚焉炎漢之後更爲郡縣隋開皇三年廢高平郡移任城於舊居邑乃屢遷井則不改魯境七百里郡有十一縣任城其衝要東盤琅邪西控鉅野北走厥國南馳互鄉青帝太昊之遺墟白衣尚書之舊里土俗古遠風流清高賢良間生掩映天下地博厚川踈明漢則名王分茅魏則天人列土所以代變豪侈家傳文章君子以才雄自高

小人則鄙朴難治況其城池爽塏邑屋豐潤香閣倚日凌丹霄而欲飛石橋橫波驚彩虹而不去其雄麗塊北有如此焉故萬商往來四海絲歷實泉貨之繁簞爲英髦之咽喉故資大賢以主東道製我美錦不易其人今鄉二十六戶一萬三千三百七十一帝澤明德以贊公宰之公溫恭克修儼碩有立李野備四時之氣十元非百里之才撥煩彌閑剖劇無滯銷百發克破於楊葉刃一鼓必合於桑林寬猛相濟弦章適中一之歲肅而教之二之歲惠而安之三之歲富而樂之然後青衿向訓黃髮履禮耒耜就役農無游

手之夫行軸和鳴機罕頓蛾之女物不知化陶然自
春權豪鋤縱暴之心黠吏返淳和之性行者讓於道
路任者併於輕重扶老攜幼尊尊親親千載百年再
復魯道非神明博遠孰能契於此乎白探竒東家竊
聽輿論輒記於壁垂之將來俾後賢之操刀知賀公
之絕跡者也

化城寺大鐘銘 并序

噫天以震雷鼓群動佛以鴻鐘驚大夢而能發揮沉
潛開覺茫蠢則鐘之取象其義博哉夫揚音大千所
以清真心警俗慮協響廣樂所以達元氣彰天聲銘

勳皇宮所以旌豐功昭茂德莫不配美金鼎增輝寶
坊仍事作制豈徒然也粵有唐宣城郡當塗縣化城
寺大鐘者量函千盈蓋邑宰李公之所勅也公名有
則系玄元之英蕤茂列聖之天枝生于公族貴而秀
出少蓋才略壯而有成西逾流沙立功絕域帝疇乎
厥庸始學古從政歷宰潔白聲聞于天天書褒榮輝
之簡牘稽首三復子孫其傳天寶之初鳴琴此邦不
言而治日計之無近功歲計之有大利物不知化潛
臻小康神明其道越不可尚方入于禪關覩天宮崢
嶸聞鐘聲瑣屑乃謂諸龍象曰盍不建大法鼓樹之

層臺使群聳六時有所歸仰不亦美乎於是發一言以先覺舉百里而感應秋毫不挫人多子來銅崇朝而山積工不日而雲會乃採鳧氏撰鳴鐘火天地之爐扇陰陽之炭回祿奮怒飛廉震驚金精轉潛以融燭銅液星縈而燿燦光噴日道氣敵天維紅雲點於太清紫煙矗於遙海烜赫宇宙功侔鬼神瑩而察之吁駭人也爾其龍質炳發虎形躩踞縻金索以上絙懸寶樓而迭擊傍振萬壑高聞九天聲動山以隱隱響奔雷而闐闐救湯鑊於幽途息劔輪於苦海景福盼嚮被于人天非李公好謀而成弘濟群有孰能與

於此乎丞尉等並衣冠之龜龍人物之標準大雅君子同僚盡心聞善賈勇贊成厥美寺主昇朝開心古容英骨秀氣洒落毫素謙柔笑言海受水而皆納鏡無形而不燭直道妙用乃如是然常虛懷忘情潔已利物是人行空寂不動見如來有若上座靈隱都維郵則舒名僧日暉蘊虛常因調護賢哉六開士普聞八萬法深入禪惠精修律義將博我以文章求我以述作功德大海酌而難名遂與六曹豪吏姑孰賢老乃緇乃黃鳧趨梵庭請揚宰君之鴻美白昔忝侍從備于辭臣恭承德音敢闕清風之頌其辭曰

雄雄鴻鐘砰隱天雷鼓霆擊警大千舍號烜赫聲無
邊摧習魑魅招靈仙傍極六道極九泉劔輪輟苦期
息肩湯鑊猛火停熾然愷悌賢宰人父母興功利物
信可久德方金鐘永不朽

天門山銘

梁山博望關扃楚濱夾據洪流寔爲吳津兩坐錯落
如鯨張鱗惟海有若唯川有神牛渚愴物目圍車輪
光射島嶼氣凌星辰卷沙揚濤溺馬殺人國泰呈瑞
時訛返珍開則九江納錫閉則五嶽飛塵天險之地
無德匪親

趙公西候新亭頌

惟十有四載皇帝以歲之驕陽秋五不稔乃以
牧恤南方凋枯伊四月孟夏自淮陰遷我天水趙公
作藩于宛陵祇明命也惟公代秉天憲作程南臺洪
柯大本聿生懿德宜乎哉橫風霜之秀氣鬱王霸之
竒略初以鐵冠白筆佐我燕京威雄振肅虜不敢視
而後鳴琴二邦天下取則起草三省朝端有聲天子
識面宰衡動聽殷南山之雷剖赤縣之劇強項不屈
三州所居大化咸列碑頌至於是邦也酌古以訓俗
宣風以布和平心理人兵鎮唯靜畫一千里時無秀

言退公之暇清眺原隰以此郡東塹巨海西襟長江
咽三吳扼五嶺輜軒錯出無旬時而息焉出自西郭
蒼然古道道寡列樹行無清陰至有疾雷破山狂飈
震嶽炎景爍野秋霖灌途馬逼側於谷口入周章於
山頂亭候靡設逢迎闕如自唐有天下作救百數因
循齷齪罔恢永圖及公來思大章前弊實相此土陟
降觀之壯其迴崗龍盤沓嶺波起勝勢交至可以有
作方農之隙廓如是營遂鏃崖埋甲驅石剪棘削汚
壤堦高隅以門以墉乃棟乃宇儉則不陋麗而不奢
森沈閉閑燥濕有庇若鳧之勇如鷗斯駕縈流鏡轉
涵映池底納遠海之餘清瀉蓮峯之積翠信一方雄
勝之郊五馬踟躕之地也長史齊公光武人倫之師
表司馬武公幼成衣冠之髦彥錄事參軍吳鎮宣城
令崔欽令德之後良材間生縱風教之樂地出人倫
之高格卓絕映古清明在躬僉謀偁功不日而就摠
是役也伊二公之力與過客沈吟以稱嘆邦人聚舞
以相賀僉曰我趙公之亭也群寮獻議請因謠頌以
名之則必與謝公其亭同不朽矣白以為謝公德不
及後世亭不留要衝無勿拜之言鮮登高之賦方之
今日我則過矣敢詢耆老而作頌曰

耽耽高亭趙公所營如鼇背突兀於太清如鵬翼開
張而欲行趙公之宇千載有覩必恭必敬爰遊爰處
瞻而思之罔敢大語趙公來翔有禮有章煌煌錡錯
如文翁之堂清風洋洋永世不忘

崇明寺佛頂尊勝陀羅尼幢頌 并序

共土不觸山媧皇不補天其鴻波汨汨流伯禹不治
水萬人其魚乎禮樂大壞仲尼不作王道其昏乎而
有功包陰陽力掩造化首出衆聖卓稱大雄彼三者
之不足徵矣粵者我西方金仙之垂範覺曠劫之大
夢碎群愚之重昏寂然不動湛而常存使苦海靜滔

天之波疑山滅炎焜之火囊括天地置之清涼日月
或墜神通自在不其偉歟魯郡崇明寺南門佛頂尊
勝陀羅尼石幢者蓋此都之壯觀昔善住天子及千
大天遊于園觀又與天女遊戲受諸快樂即於夜分
中聞有聲曰善住天子七日滅後當生七反畜生之
身於是如來授之吉祥真經遂脫諸苦蓋之天徵一作
從爲大法印不可得而聞也我唐高宗時有蜀賓桑
門持入中土猶日藏大寶清園虛空檀金淨彩人皆
悅見所以山東開士舉國而崇之時有萬商投珍士
女雲會衆布蓄香知陵琢文石於他山聳高標於列

肆鏡珉錯練為鯨為螭天人海甞若叱若語貝葉金
言刊其上荷花水物形其隅良工草萊獻技而去聖
君垂拱南面穆清而居大明廣運無幽不燭以天下
所立茲幢多臨諸旗亭喧囂湫隘本非經行網繞之
所乃頒下明詔令移於寶坊吁百尺中標矗若雲斷
委翳苔蘚周流星霜俾龍象興嗟仰瞻無地良可嘆
也我太官廣武伯隴西李公先名琬奉詔書改為輔
其從政也肅而寬仁而惠五鎮方牧聲聞于天帝乃
加剖竹于魯魯道粲然可觀方將和陰陽於太階致
君於堯舜豈徒閉閣坐嘯鴻盤二千哉乃再崇厥功
發揮象教於是與長史盧公司馬李公等咸明明在
公綽綽有裕韜大國之寶鐘元精之和榮兼半刺道
光列嶽才或大而用小識無微而不通政其有經談
豈更僕有律師道宗心摠群妙量苞大千日何瑩而
常明天不言而自運識岸浪注玄機清發每口演金
偈舌掃電光開關延敵罕有當者由萬竅同號於一
風衆流俱納於溟海若乃嚴飾佛事規矩梵天法堂
鬱以霧閣香樓及乎島峙皆我公之締構也以天寶
八載五月一日示滅大寺百城號天四衆泣血焚香
散花扶輿卧轅仙鶴數十飛鳴中絕非至德動天深

仁感物者其孰能與於此乎三綱等皆論窮彌天惠
湛清月傳千燈於智種了萬法於真空不謀同心克
樹聖跡太官李公乃命門於南垣廟通衢曾盤舊規
累構餘石壯士加勇力倅拔山繞擊鼓以雷作拖鴻
縻而電掣千人壯萬夫勢轉鹿盧於橫梁泯環合而
無際常六合之振動崛九霄之崢嶸非鬼神功曷以
臻此況其清景燭物香風動塵群形所需積苦都雪
祭星辰而增輝挂文字而不滅雖漢家金莖伏波銅
柱擬茲陋矣或日月圓滿方檀散華清心諷持諸佛
稱贊夫如是亦可以從一天至一天開天宮之門見

群聖之顏巍巍功德不可量也其錄事參軍六曹英
察及十一縣官屬有宏才碩德含香繡衣者皆列名
碑陰此不具載郡人郡水使者宣道先生孫太冲得
真人紫藥玉笈之書能令太一神自成還丹以獻于
帝帝服享萬壽與天同休功成身退謝病而去不謂
古之玄通微妙之士歟乃謂白曰昔王文考觀藝於
魯騁雄辭於靈光陸佐公知名在吳銘雙闕於盤石
吾子盍可美盛德揚中和恭承話言敢不惟命遂作
頌曰

揭高幢兮表天宮嶷獨出兮凌星虹神縱縱兮來空

伛扶傾乎蒼穹西方大聖稱大雄橫絕苦海舟群蒙
陀羅尼藏萬法宗善住天子獲厥功明明李君牧東
魯再新頽規扶衆苦如大雲王注法雨邦人清涼喜
聚舞揚鴻名兮振海浦銘豐碑兮昭萬古

為竇氏小師祭璿和尚文

年月日某謹以齋蔬之奠敢昭告于和尚之靈伏惟
和尚降靈自天依化遊世角立獨出巖然生知鳳凰
開九包之翼豫章橫萬頃之陂始傳燈而納照因落
髮以從師邁龍象以蹴踏為天人之羽儀紹釋風於
西域迴佛日於東維若大塊之噫氣鼓和風而一吹
熱惱清灑道芽榮滋走吳楚以宗仰將掃地而歸之
嗚呼來無所從去復何適水還火歸蕭散本宅寶舟
輟棹禪月掩魄痛一往而無蹤愴雙林之變白某早
承訓誨偏荷恩慈忝飡風於法侶旋落蔭於禪枝號
無輟響泣有餘悲手撰茗藥精誠嚴思冀神道之昭
格庶明靈而饗之

為宋中丞祭九江文

謹以三牲之奠敬祭于長源公之靈惟神包括乾坤
平準天地劃三峽以中斷疏九道以爭奔網紀南維
朝宗東海牲玉有禮祀典無虧今萬乘蒙塵五陵悽

黷蒼生悉爲白骨赤血流於紫宮宇宙倒懸攬捨未
滅含識結憤思翦元兇而況叅列旌藩各當重竒遵
奉王命大舉天兵照海色於旌旗肅軍威於原野而
洪濤渤滴狂飈振驚惟神使陽侯卷波義和奉命樓
船先濟士馬無虞掃妖孽於幽燕斬鯨鯢於河洛惟
神祐我降休于民敬陳精誠庶垂歆饗

李翰林集卷第二十六

李翰林集卷第二十七

翰林供奉李白

讚歌

當塗李宰君畫讚

金陵名僧顧公粉圖慈親讚

李居士讚

安吉崔少府翰畫讚

宣城吳縣事畫讚

壁畫蒼鷹讚

師猛讚

羽林范將軍畫讚

金銀泥畫西方淨土變相讚

江寧楊利物畫讚

金鄉薛少府廳畫鶴讚

誌公畫讚

琴讚

朱虛侯讚

觀飲飛斬蛟圖讚

地藏菩薩讚

魯郡葉和尚讚

當塗李宰君畫讚

天垂元精嶽降粹靈應期命世大賢乃生吐奇獻策
敷聞王庭帝用休之揚光泰清濫觴百里涵量八冥
縉雲飛聲當塗政成雅頌一變江山再榮舉邑抃舞
式圖丹青眉秀華蓋目朗明星鶴矯閣風麟騰玉京
若揭日月昭然運行窮神闡化永世作程

金陵名僧頽公粉圖慈親讚

神妙不死惜生此身託體明泚而糝厥親粉為造化
筆寫天真貌古松雪心空世塵文伯之母可以為鄰
李居士讚

至人之心如鏡中影揮斤萬變動不離靜彼質我斤
揮風是騁了物無二皆為匠郢吾族賢老名喧寫真
貌圖粉繪生為垢塵從自得與天為鄰然然不滅
長存此身

安吉崔少府翰畫讚

齊表巨海吳嗟大風崔為令族出自太公克生奇才
骨秀神聰炳若秋月騫然雲鴻爰圖伊人奪妙真宰
卓立欲語謂行而在清晨一觀爽氣十倍張之座隅
仰止光彩

宣城吳錄事畫讚

大名之家昭彰日月生此髦士風霜秀骨圖真像賢
傳容寫髮束帶嶽立如朝天關巖巖兮謂四方之削
成澹澹兮申五湖之澄明武庫肅穆辭峯崢嶸大辯
若訥大音希聲默然不語終為國楨

壁畫蒼鷹讚

讚主人

突兀枯樹傍無寸枝上有蒼鷹獨立若愁胡之橫眉
凝金天之殺氣凜粉壁之雄姿背銛劍戟爪握刀鋒
群賓失席以睥眄未悟丹青之所為吾嘗恐出戶騰
以飛去何意終年而在斯

師猛讚

張公之堂華壁照雪師猛在圖雄姿奮發森竦眉目
颯灑毛骨鋸牙銜霜鈎爪抱月掣躡胡一本云以震
怒謂大厦一作夏之堯杌永觀厥容神駭不歇舊本附
卷無未觀厥容
神駭不歇二句

羽林范將軍畫讚

羽林列衛壁壘南垣四十五星光輝至尊范公拜將
遙承主恩位寵虎臣封傳鴈門瞻天蹈舞踊躍精魂
逐逐鸚視昂昂鴻騫心豪祖述氣爽劉琨名震大國
威揚列藩麟閣之階粉圖華軒胡兵百萬橫行縱吞
爪牙帝室功業長存

金銀泥畫西方淨土變相讚 并序

我聞金天之西日沒之所去中華十萬億刹有極樂
世界焉彼國之佛身長六十萬億恒沙由旬眉閒白
毫向右宛轉如五須彌山目光清白若四海水端
坐說法湛然常存沼明金沙岸列珍樹欄楯彌覆
羅網周張車渠瑠璃為樓殿之飾頗黎碼碯耀階砌
之榮皆諸佛所證無虛言者金銀泥畫西方淨土變
相蓋馮翊郡秦夫人奉為亡夫湖州刺史韋公之所
建也夫人蘊冰玉之清敷聖善之訓以伉儷大義
希拯拔幽塗父子恩深用重修於景福誓捨珍物購

求名工圖金創端繪銀設像八法功德波動青蓮之
池七寶香花光映黃金之地清風所拂如生五音百
千妙樂咸疑動作若已發願未及發願若已當生未
及當生精念七日必生其國功德罔極酌而難名讚曰
向西日沒處遙瞻大悲顏月淨四海水身光紫金山
勤念必往生是故稱極樂珠網珍寶樹天花散香閣
圖畫了在眼願託彼道場以此功德海冥祐為舟
梁八十一劫罪如風掃輕霜庶觀無量壽長願玉毫光

江寧揚利物畫讚

太華高嶽三峯倚天洪波經海百代生賢為夔為龍
廓土濟川趙城開國玉樹凌煙筆鼓元一形分自然
明珠獨轉秋月孤懸作宰作程權剛挫堅德合窈冥
聲播蘭荃鴻漸麟閣英圖可傳

金鄉薛少府廳畫鶴讚

高堂閑軒一作明軒今雖聽訟而不擾圖蓬山之奇禽
想瀛海之縹緲紫頂煙施丹眸星皎昂昂佇胎一作欲飛
霍若驚矯形留座隅勢出天表謂長鳴一作於風霄
終寂立於露曉凝翫益古俯察逾如舞疑傾市聽似
聞絃儻感至精以神變可弄影而浮煙

誌公畫讚

水中之月了不可取虛空其心寥廓無主錦標烏瓜
獨行絕侶刀齊尺梁扇迷陳語丹青聖容何住何所
一作去
往何所

琴讚

嶧陽孤桐石聳天骨根老冰泉葉苦霜月斲為綠綺
徽聲繁發秋風入松萬古奇絕

朱虛侯讚

嬴氏穢德金精摧傷秦鹿克獲漢風飛揚赤龍登天
白日昇光陰虹賊虐諸呂擾攘朱虛來歸會酌高堂
雄劔奮擊太后震惶爰鋤產祿大運乃昌功冠帝室

于今不亡

觀次飛斬蛟龍圖讚

伏飛斬長蛟遺圖畫中見登舟旣虎嘯激水方龍戰
驚波動連山拔劔曳雷電鱗摧白刃下血染滄江變
感此壯古人千秋若對面

地藏菩薩讚 并序

大雄掩照日月崩落惟佛智慧大而光生死雪賴假
普慈力能救無邊苦獨出曠劫導開橫流則地藏菩
薩為當仁矣弟子扶風竇滔少以英氣爽邁結交王
侯清風豪俠極樂生疾乃得惠劔於真宰湛本心於

虛空顏圖聖容以祈景福庶冥力憑助而厥考有瘳
爰命小才式讚其事讚曰
本心若虛空清淨無一物焚蕩淫怒癡圓寂了見佛
五綵圖聖像悟真非妄傳掃雪萬病盡爽然清涼天
讚此功德海永為曠代宣

魯郡葉和尚讚

海英嶽靈誕彼開士了身皆空觀月在水如薪傳火
朗徹生死如雲開天廓然萬里寂滅為樂江海而開
逆旅形內虛舟世間邈彼崑閬誰云可攀

李翰林集卷第二十七

李翰林集卷第二十八

翰林供奉李白

序上

暮春於江夏送張祖監丞之東都序

奉餞十七翁二十四翁尋桃花源序

夏日奉陪司馬武公與群賢宴姑孰亭序

江夏送林公上人遊衡嶽序

金陵與諸賢送權十一序

春於姑孰亭送趙少府遷炎方序

春於南浦與諸公送陳郎將歸衡陽序

秋於敬亭送從姪嵩遊廬山序

汎沔州城南郎官湖詩序

暮春江夏送張祖監丞之東都序

吁咄哉僕書室坐愁亦已久矣每思欲遐登蓬萊極目四海手弄白日頂摩青穹揮斥幽憤不可得也而金骨未變玉顏已緇何常不捫松傷心撫鶴歎息誤學書劔薄遊人間紫微九重碧山萬里有才無命甘於後時劉表不用於禰衡暫來江夏賀循喜逢於張翰且樂船中達人張侯大雅君子統泛舟之役在清川之湄談玄賦詩連興數月醉盡花柳賞窮江山王

命有程告以行邁烟景晚色慘爲愁容繫飛帆於半

天汎綠水於遙海欲去不忍更開芳樽樂雖寰中趣逸

天半一作外平生酣暢未若此筵至於清談浩歌雄筆

麗藻咲飲醪酒醉揮素琴余實不媿於古人也揚袂遠別何時歸來想洛陽之秋風將鱸魚以相待詩可贈遠無乃闕乎

奉餞十七翁二十四翁尋桃花源序

昔祖龍滅古道嚴威刑煎熬生人若墜大火三墳五典散爲寒灰築長城建阿房并諸侯殺豪俊自謂功高義皇國可萬世思欲凌雲氣求仙人登封太山風

雨暴作雖五松受職草木有知而萬象乖度禮刑將
弛則綺皓不得不遁於南山魯連不得不蹈於東海
則桃源之避世者可謂超升先覺夫指鹿之儔連頸
而同死非吾黨之謂乎二翁耽老氏之言繼少卿之
作文以述大雅道以通至精卷舒天地之心脫落神
仙之境武陵遺跡可得而窺焉問津利往水引漁者
花巖仙谿春風不知從來落英何許流出石洞來入
晨光盡開有良田名池竹果森列三十六洞別為一
天耶今扁舟而行然咲謝人世阡陌未改古人依然
白雲何時而歸來青山一去而誰往諸公賦桃源以美之

夏日奉陪司馬武公與群賢宴姑孰亭序
通驛公館南有水亭焉四薨翬飛巉絕浦嶼盖有前
攝令河東薛公棟而宇之今宰隴西李公明化開物
成務又橫其梁而閣之畫鳴閑琴夕酌清月蓋為接
輶軒祖遠客之佳境也製置既久莫知何名司馬武
公長材博古獨映方外因據胡牀岸幘嘯詠而謂前
長史李公及諸公曰此亭跨姑孰之水可稱為姑孰
亭焉嘉名勝槩自我作也且夫曾官紱冕者大賢處
之若遊青山卧白雲逍遙偃傲何適不可小才居之
窘而自拘悄若桎梏則清風朗月河英嶽秀皆為棄

物安得稱焉所以司馬南隣當文章之旗鼓翰林客
卿揮辭鋒以戰勝名教樂地無非得俊之場也千載
一時言詩紀志

江夏送林公上人遊衡嶽序

江南之仙山黃鶴之爽氣偶得英粹後生後人林公
世爲豪家此土之秀落髮歸道專精律儀白月在天
朗然獨出旣灑落於彩翰亦諷誦於人口閑雲無心
與化偕往欲將振五樓之金策浮三湘之碧波乘杯
沂流考室名嶽瞰憩眞壑凌臨諸天登祝融之峯巒
望長沙之煙火遙謝舊國誓遺歸蹤百千開士稀有

此者余所以歎其峻節揚其清波龍象先輩迴眸拭
視比夫汨泥沙者相去九牛之一毛昔智者安禪於
台山遠公托志於廬嶽高標勝槩斯亦嚮慕哉紫霞
搖心青楓夾岸目斷川上送君此行群公臨流賦詩以贈
金陵與諸賢送權十一序

斯高柄秦嬴世不二三傑伏草與漢並出莽夷朱暉
耿鄧乃起自古英達未必盡用於當年去就之理在
大運爾我君六葉繼聖熙乎玄風三清垂拱穆然紫
極天人其一哉所以青雲豪士散在商鈞四坐明哲
皆清朝旅人吾希風廣成蕩漾浮世素受寶訣爲三

十六帝之外臣即四明逸老賀知章呼余爲謫仙人
蓋實錄耳而嘗採姹女於江華收河車於清溪與天
水權昭夷服勤爐火之業久矣之子也沖恬淵靜翰
才峻發白每一篇一札皆昭夷之所操吁捨我而南
若折羽翼時歲律寒苦天風枯聲雲帆涉漢罔若絕
電舉目四顧霜天崢嶸銜杯叙離群子賦詩以出錢
酒仙翁李白辭

春於姑孰送趙四流炎方序

白以鄒魯多鴻儒燕趙饒壯士蓋風土之然乎趙少
翁才貌瓌雅志氣豪烈以黃綬作尉泥蟠當塗亦難

棲鶴籠不足以窘束鸞鳳

一作鳳

耳以疾惡抵法遷于

炎方辭高堂而墜心指絕國以搖恨天與水遠雲連
山長借光影於頃刻開壺觴於洲渚黃鶴曉別愁聞
命子之聲青楓暝色盡是傷心之樹然自吳瞻秦日
見喜氣上當攫玉弩摧狼狐洗清天地雷雨必作冀
白日迴照丹心可明巴陵半道坐見還吳之棹令雪
解而松栢振色氣和而蘭蕙開芳僕西登天門望子
於西江之上吾賢可流水其道浮雲其身通方大道
何往不可何戚戚於路岐哉

秋於敬亭送從姪嵩遊廬山序

余小時大人令誦子虛賦私心慕之及長南遊雲夢
覽七澤之壯觀酒隱安陸蹉跎十年初嘉興季父謫
長沙西還時余拜見預飲林下需乃稚子嬉遊在傍
今來有成鬱負秀氣吾衰久矣見爾慰心中悲道舊
破涕爲笑方告我遠涉西登香爐長山橫蹙九江却
轉瀑布天落半與銀河爭流騰虹奔電激射萬壑此
宇宙之奇詭也其上有方湖石井不可得而窺焉羨
君此行撫鶴長嘯恨丹液未就白龍來遲使秦人著
鞭先往桃花之水孤負夙願慙歸名終期後來攜
手五嶽情以送遠詩寧闕乎

浣沔州城南郎官湖序

詩數十
八卷

乾元歲秋八月白遷於夜郎遇故人尚書郎張謂出
使夏口沔州牧杜公漢陽宰王公鶴于江城之南湖
樂天下之再平也方夜永月如練清光可掇張公殊
有勝集四望超然乃顧白曰此湖古來賢豪遊者非
一而枉踐佳境寂寥無聞夫子可爲我標之嘉名以
傳不朽白因舉酒酌水号之曰郎官湖亦由鄭圃之
有僕射陂也席上文士輔翼岑靜以爲知言乃命賦
詩紀事刻石湖側將與大別山其相磨滅焉

李翰林集卷第二十八



李翰林集卷第二十九

翰林供奉李白

序中

答族姪僧中孚贈玉泉仙人掌茶序已見第十二卷

贈嵩山焦鍊師詩序已見第八卷

送黃鐘之鄱陽謁張使君序

早春於江夏送蔡十還家雲夢序

秋日太原南柵餞陽曲王贊賈少公石艾尹公

應舉赴上都序

送戴十五歸衡嶽序

早夏於將軍叔宅與諸昆季送傅八之江南序
冬日於龍門送從弟京兆參軍令問之淮南觀
省序

送黃鐘之鄱陽謁張使君序

東南之美者有江夏黃公焉白竊飲風流始接談笑
亦有抗節玉立光輝炯然氣高時英辯折天口道可
濟物志棲無垠鄱陽張公朝野榮望愛客接士即原
嘗春陵之亞焉每欽其辭華懸榻見往而黃公因訪
古跡便從貴遊乃僑裝撰行去國遐陟諸子銜酒惜
別沾巾贈分沈醉烟夕惆悵涼月天南迴以變夏火
西飛而獻秋汀葭颯然海草微落夫子行邁我心若
何毋金玉爾音而有遐心湖水演沔勗哉是行共賦
武昌釣臺篇以慰別情耳

早春於江夏送蔡十還家雲夢序

吾觀蔡侯奇人也爾其才高氣遠有四方之志不然
何周流宇宙太多耶白遐窮冥搜亦以早矣海草三
綠不歸國門又更逢春再結鄉思一見夫子冥心道
存窮朝晚以作宴驅煙霞以輔賞朗笑明月時眠落
花斯遊無何尋告睽索來暫觀我去還愁人乃浮漢
陽入雲夢鄉拙云叩歸魂亦飛且青山綠楓累道相

接遇勝因賞利君前行既非遠離曷足多歎秋七月
結遊鏡湖無憊我期先子而往敬慎好去終當早來
無使晚耶白雲不得復弄爾鄉中廖公及諸才子爲
詩略謝之

秋日於太原南柵餞陽曲王贊公賈少公
石艾尹少公應舉赴上都序

天王三京北都居一其風俗遠蓋陶唐氏之人歟襟
四塞之要衝控五原之都邑雄藩劇鎮非賢莫居則
陽曲丞王公神仙之胄也爾其學鏡千古知周萬殊
又若少府賈公以述作之雄也齎弄筆海虎攫辭場

又若石艾尹少公廊廟之器口折黃馬手揮青萍咸
道貫於人倫名飛於日下實難沈屈永懷青霄劍有
隱而氣衝七星球雖潛而光照萬壑今年春皇帝有
事千畝湛恩八埏大搜群才以緝邦政而王公以令
宰見舉賈公以王霸昇聞海激佇乎三千天飛期於
六月必有以也豈徒然哉有從兄太原王薄辭才華
動時規詩匠物乃點翠幕筵虹梁瓊羞霞開羽觴電
舉然後抗目遠覽憑軒高吟屏俗事於煩襟結浮歡
於落景俄而皓月生海來窺醉容黃雲出關半起秋
色數君乃輟酌慷慨搖心促裝望丹闕而非遠揮王

鞭而且去白也不敏先鳴翰林幸叨玳瑁之筵敢竭
麒麟之筆請各探韻賦詩寵行

送戴十五歸衡嶽序

白上探玄古中觀人世下察交道海內豪俊相識如
浮雲自謂德叅夷顏才亞孔墨莫不名由口進實從
事退而風義可合者厥惟戴侯戴侯寓居長沙稟湖
嶽之氣少長咸洛窺霸王之圖精微可以入神懿重
可以崇德謨猷可以尊主文藻可以成化兼以五材
統以四美何往而不濟也其二三諸昆皆以才秀擢
用辭翰炳發昇聞天朝而此君獨潛光後世以期大

用鯤海未躍鵬霄悠然不遠千里訪余以道邛國之
秀有廖侯焉人倫精鑒天下獨立每延以宴謔許爲
通人獨孤有隣及薛諸公咸亦以爲信然矣屬明主
未夢且歸衡陽憩祝融之雲峯弄茱萸之湍水軒騎
糾合祖於魏公之林亭笙歌鳴秋劒舞增氣况江葉
墜綠沙鴻冥飛登高送遠使人心醉見周張二子爲
論平生雞黍之期當速赴也

早夏於將軍叔宅與諸昆季送傅八之

江南序

易曰觀乎人文以化成天下窮此道者其惟傳侯耶

侯篇章驚新海內稱善五言之作妙絕當時陶公愧
田園之能謝客慙山水之美佳句籍籍人爲美談前
許州司馬宋公蘊冰清之姿重傳侯玉潤之德妻以
其子鳳凰子飛潘楊之好斯爲睦矣僕不佞也忝于
芳塵宴同一筵心契千古清酌連曉玄談入微歡攜
無何旋告睽圻將軍叔英略蓋古英明洞神天王貴
宗誕育賢子八龍增秀以列次五色相輝而有文會
言高樂曉餞金門洗德絃觴怡顏朱明草木已盛且
江嶂若畫賞盈前途自然屏間坐遊鏡裏行到霞月
千里足供文章之用哉征帆空懸落日相迫二李揮

翰詩其贈焉

冬日於龍門送從弟京兆參軍令問之淮

南觀省序

紫雲仙季有英風焉吾家見之若衆星之有月貴則
天王之令弟寶則海嶽之奇精遊者所謂風生玉林
清明蕭洒真不虛也常醉目吾曰兄心肝五臟皆錦
繡耶不然何開口成文揮翰霧散吾因撫掌大笑揚
眉當之使至澄再聞亦復絕倒觀夫筆走群象思通
神明龍章炳然可得而見歲十二月拜省于淮南思
白華之長吟眺黃雲之晚色目斷心盡情懸高堂傾

蘭醕而送行赫金鞍而照地錯轂躡野朝英滿筵非
才名動時何以及此日落酒罷前山陰煙殷勤惠言
吾道東坐想洛橋春色先到淮城見千條之綠楊折
一枝以相贈則華萼情在吾無恨焉群公賦詩以光
祭餞

李翰林集卷第二十九

李翰林集卷第三十

翰林供奉李白

序下

江夏送倩公歸漢東序

餞李副使藏用移軍廣陵序

澤畔吟序

夏日諸從弟登汝州龍興閣序

秋日於安府送孟贊府兄還都序

春夜宴從弟桃花園序

冬夜於隨州紫陽先生飡霞樓上送烟子元演

隱仙城山序

江夏送倩公歸漢東序

謝安四十卧白雲於東山栢公累徵為蒼生而一起
常與支公遊賞貴而不移大人君子神冥契合正可
乃爾僕與倩公面不忝古人言歸漢東使我心痲夫
漢東之國聖人所出神農之後李良為大賢爾來寂
寂無一物可紀有唐中興始生紫陽先生先生六十
而隱化若繼跡而起者惟倩公焉蓄壯志而未就期
老成於他日且能傾產重諾好賢攻文即惠休上人
與江鮑徃復各一時也僕平生述作罄其草而授之

思親遂行流涕惜別今聖朝已捨李布當徵賈生開
顏洗目一見白日冀相視而笑於新松之山耶作小
詩絕句以寫別意李白辭曰一本無此四字彼美一作漢東
國川藏明月輝寧知喪亂後更有一珠歸

錢李副使藏用移軍廣陵序

夫功未足以蓋世威不可以震主必挾此者持之安
歸所以彭越醢於前韓信誅於後況權位不及於此
者虛生危疑而潛苞禍心小拒王命是以謀臣將啖
以節鉞誘而烹之亦由借鴻濤於奔鯨鱣生人於孝
虎呼吸江海橫流百川左縈右拂十有餘郡國計未

及誰當其鋒我副使李公勇冠三軍衆無一旅橫倚
天之劔揮駐日之戈吟嘯四顧熊羆雨集蒙輪扛鼎
之士杖干將而星羅上可以決天雲下可以絕地維
翕振沉旅赫張王師退如山立進若電逝轉戰百勝
殭屍盈川水膏於滄溟陸血於原野一掃瓦解洗清
全吳可謂萬里長城橫斷楚塞不然五嶺之北盡餌
於脩蛇勢盤地感不可圖也而功大用小天高路遐
社稷雖定於劉章封侯未施於李廣使慷慨之士長
吁青雲且移軍廣陵恭揖後命組練照雪樓船乘風
簫鼓沸而三山動旌旗揚而九天轉良牧出祖烈將
能爲

澤畔吟序

澤畔吟者逐臣崔公之所作也公代業文宗早茂才
秀起家校書蓬山再尉關輔中佐于憲車因貶湘陰
從宦二十有八載而官未登於郎署何遇時而不偶
耶所謂大名難居碩果不食流離乎沅湘摧頽於草
莽同時得罪者數十人或才長命夭覆巢蕩室崔公
忠憤義烈形于清辭慟哭澤畔哀形翰墨猶風雅之

什聞之者無罪覩之者作鏡書所感遇愬二十章名
之曰澤畔吟懼奸臣之猜常韜之於竹簡酷吏將至
則藏之於名山前後數四蠹傷卷軸觀其逸氣頓挫
英風激揚橫波遺流騰薄萬古至於微而彰婉而麗
悲不自我興成他人豈不云怨者之流乎余覽之愴
然掩卷揮涕爲之序云

夏日諸從弟登汝州龍興閣序

夫槿榮芳園蟬嘯珍木蓋紀乎南火之月也可以處
臺榭居高明吾之友于順此意也遂卜精勝得乎龍
興留寶馬於門外步金梯於閣上漸出軒戶遐瞻雲
天晴山翠遠而四合暮江碧流而一色屈指鄉路還
疑夢中開襟危欄宛若空外嗚呼屈宋長逝無堪與
言起予者誰得我二季當揮爾鳳藻搜乎需觴與白
雲老兄俱莫負古人也

秋夜於安府送孟贊府兄還都序

夫士有飾危冠佩長劍揚眉吐諾激昂青雲者咸誇
炫意氣託交王侯若告之急難乃十失八九我義兄
孟子則不然耶道合而襟期暗親志乖而肝膽楚越
鴻鸞鳳立不循常流孔明披書每觀於大畧少君讀
易時作於小文四方賢豪眩然景慕雖長不過七尺

而心雄萬夫至於酒情中酣天機俊發則談笑滿席
風雲動天非嵩丘騰精何以及此白以弱植早飲香
名况親承光輝恩甚華萼他鄉此別誰無恨耶時林
風吹霜散下秋草海鴈嘶月孤飛朔雲驚魂動骨憂
瑟落涕抗手緬邁傷如之何且各賦詩以寵歧路

春夜宴從弟桃花園序

夫天地者萬物之逆旅也一本云夫萬物者天地之逆旅也光陰者
百代之過客也而浮生若夢為歡幾何古人秉燭夜
遊良有以也沈陽春召我以烟景大塊假我以文章
會桃花之芳園序天倫之樂事群季俊秀皆為惠連

吾人詠歌獨慙康樂幽賞未已高談轉清開瓊筵以
坐花飛羽觴而醉月不有佳詠何伸雅懷如詩不成
罰依金谷酒斗數

冬夜於隨州紫陽先生餐霞樓送烟子元

演隱仙城山序

吾與霞子元丹烟子元演氣激道合結神仙交殊身
同心誓老雲海不可奪也歷可天下周求名山入神
農之故鄉得胡公之精術胡公身揭日月心飛蓬萊
起餐霞之孤樓鍊吸景之精氣延我數子高談混元
金書玉訣盡在此矣白乃語及形勝紫陽因大誇仙

城元侯聞之乘興將往別酒寒酌醉月田而少留夢
魂曉飛度淶水以先去吾不凝滯於物與時推移出
則以平交王侯適則以俯視策許朱紱狎我綠蘿未
歸恨不得同棲烟林對坐松月有所疑然銘契潭石
乘春當來且抱琴卧花高枕相待壽以寵別賦而贈
之

李翰林集卷第三十

新唐書本傳

李白字太白興聖皇帝九世孫其先隋末以罪徙西
域神龍初遁還客巴西白之生母夢長庚星因以命
之十歲通詩書既長隱岷山州舉有道不應蘇頲為
益州長史見白異之曰是子天才英特少益以學可
比相如然喜縱橫術擊劍為任俠輕財重施更客任
城與孔巢父韓準裴政張叔明陶沔居徂來山日沈
飲號竹溪六逸天寶初南入會稽與吳筠善筠被召
故白亦至長安往見賀知章知章見其文歎曰子謫仙
人也言於玄宗召見金鑾殿論當世事奏頌一篇帝

賜食親爲調羹有詔供奉翰林白猶與飲徒醉于市
帝坐沉香子亭意有所感欲得白爲樂章召入而白
已醉左右以水頰面稍解援筆成文婉麗精切無留
思帝愛其才數宴見白嘗侍帝醉使高力士脫鞵力
士素貴恥之適其詩以激揚貴妃帝欲官白妃輒沮
止白自知不爲親近所容益驚放不自脩與知章李
適之汝陽王璉崔宗之蘇晉張旭焦遂爲酒八仙人
懇求還山帝賜金放還白浮游四方嘗乘月與崔宗
之自采石至金陵著宮錦袍坐舟中旁若無人安祿
山反轉側宿松匡廬間永王璘辟爲府僚佐璘起兵

逃還彭澤璘敗當誅初白游并州見郭子儀奇之子
儀嘗犯法白爲救免至是子儀請解官以贖有詔長
流夜郎會赦還尋陽坐事下獄時宋若思將吳兵三
千赴河南道尋陽釋囚辟爲叅謀未幾辭職李陽冰
爲當塗令白依之代宗立以左拾遺召而白已卒年
六十餘白晚好黃老度牛渚磯至姑孰悅謝家青山
欲終焉及卒葬東麓元和末宣歙觀察使范傳正祭
其冢禁樵採訪後裔惟二孫女嫁爲民妻進止仍有
風範因泣曰先祖志在青山頃葬東麓非本意傳正
爲改葬立二碑焉告二女將改妻士族辭以孤窮失

身命也不願更嫁傳正嘉歎復其夫佞役文宗時詔以白歌詩裴旻劍舞張旭草書為三絕

附錄

斷崖如削爪嵐光破崖綠天河從中來白雲漲川谷

玉按赤文字世眼不可讀攝衣凌青霄蒼一作霞松風吹

我足

右李太白題司空山瀑布詩得之東里周子中附

于卷末紹熙元年七月開封趙汝愚題

予一日與同舍劉辰翁會孟評詩至太白會孟曰且止當塗稱太白太白且其詩安在予於是曉然媿於其言蓋舊刻之不存雷電取將久矣予為學官備復經始每每不暇給抑豈不可後顧將去此獨不能為太白一日之役以藏不朽孰有如予之汨且陋乎明日以告古心公公喟然曰歲晚矣柰何吾成子之志亟為之則禪凡費集衆工不足則布之諸郡不兩月而集集成而公亦台矣或謂白雖天才了不可並語少刪之其庶幾乎孟曰不然近年甫有此論予美退之所不敢聞也詩志不

深於情令人地稱脫鞵脫鞵直偶然固不自以為
高萬固不可及彼無所擇自不害其超然耳予愛
其言有理因復識之是集多趙同舍崇釜養大所
校正咸淳己巳三月望天台戴覺民希尹書

